

Monday, April 14, 2025

Time - 2:30pm - 2:35pm

## REGIONAL NEWS BULLETIN

(MIDDAY)

### FIRE SERVICE WEEK

Tukin khan Fire Service Week pualin Fire & Emergency Services Headquarters, Hunthar Vengah hun hman a ni a, kangmei thelh avanga nunna chan ta te hriatrengna hun hman a ni bawk.

Vawiin bik hi Fire Service Day leh Martyrs Day puala hun hman anih angin Mizoram hmun hrang hranga Fire Station te chuan hemi pual hian hun an hmang a, Martar te sunna hunah hian kangthelhnaa leh duty kaihhnawihna thi te sun nan hun hman niin Martar te thlanah pangpar dah a ni bawk.

Kum tinin Fire Service Week hi India ram pumah April ni 14 atanga April ni 20 chhungin hman thin a ni a, Kumin atana thupui chu *Kangmei lakah kan ram a him nan, i tangrual ang u"* tih niin Fire Service Week pual hian Fire Station tin ten Hospital/Nursing Home pakhat leh School pakhat zel kangmei chhuah thulh a a him leh him loh endik na neih a ni dawn a, Fire Station zawng zawng ten an huamchin hnai vaiah Sikul thlan bik neiin Fire Safety Lecture & Mock Drill chu Sikul thuneitute nen inbe rawnin an buatsaih dawn a ni.

Kumin hian Ministry of Home Affairs hnuaia Director General- Fire Service, Civil Defence & Home Guard chuan Mizoram Fire & Emergency Service a thawk mi 5 (panga) te chu an hnathawh that avangin lawmman dawng turin a rawn thlang a, Leading Firefighter J. Zoliana, Siaha Fire Station ami leh Firefighter H Lalthlamuana, Vairengte Fire Station ami leh Firefighter S. Lalremruata, Fire & Emergency Headquarters ami leh Firefighter L. David Vungzaliana, Khatla Fire Station ami bakah Driver Special Grade Thangchhuana, Kolasib Fire Station ami te chu lawmman dawng tura thlan an ni.



### LUNGLEI WATER SCARCITY

Lunglei khawpuia tui vang chuan zuallam a pan zel a, PHE Department hotute chuan Tlawng lui tui nghah khawl a ngaih avangin mipuite hriatthiamna an ngen tih an sawi.

Lunglei tui lakna Pialthleng atanga Tui pump in mipui mamawh a phuhruk loh avangin PHE Department chuan Truck Owner Association(TOA) te nen ruahmanna siamin Motor lian 10 hmangin veng thlan bik leh tui harsat zual naah tuisem hna an kalpui mek a, Chhungkaw khatah Bucket 6 zel a sem

niin ruahman lawk ang chuan Motora tuisem hi April ni 18 thleng kalpui a ni dawn a ni.

Lungleia tui harsat avang hian Motor hmanga tui chawi turin a remchang apiangah pump chhawn a ni a, hetihlai hian insu, inbual leh Motor sil an lo awm thin avangin PHE Department chuan Tuichawi Li an tih mai, Mat luiah duty insiam in tui ti bawlhhlawh lo turin ngenna an siam a, PHE Lunglei a thawk te chuan mipui te mamawh phuhru turin an theihtawp an chhuah zel a, hetihlai hian an dan pangngaiin tui connection nei hnenah rualkhai takin sem hna an kalpui ve reng a, nimin Pathianni khan Vertical Turbine(VT) pump chhunga chirhnawi leh bawlhhlawh lut te staff thenkhat ten an thianfai bawk a ni.

Lunglei tui lakna hi tun dinhmunah Dârkâr 10 bawr vel tui pump theih a ni a, Tlawng lui tui nghah khawl a ngaih avangin tui sem a khât tawh hle a, PHE Department hotute chuan a mipuite hriatthiamna an ngên tih an sawi.



ZPM PRESS CONFERENCE

ZPM Thalai hruaitute chuan tun hnaia Ruihhlo kaihhnawiha man Henry Lalbiakzinga Chhungdeng leh ZPM Minister leh Party hruaitute inzawmna nei anga an sawi chu thubelhchian dawl lo a nih thu sawiin thu diklo theh darhtu chungah wawiin khan FIR thehluh an tum thu an sawi.

Wawiina khan Aizawl Press Club-a thuthar lakhawmtute an kawmna ah he thu hi sawiin ZPM Thalai Vice President Pu Rokhuma chuan thubelhchian dawl lo theh darhtute chu a tawp thlenga dan hmanga umzui an tum thu a sawi a, Ram hlui zia politics changchawitute'n thlalak hlui hrang hrang zawng khawm a, zeldin thubawla dawt phuahchawp hmanga mipui rilru hruai kawi thei tura social media-a thu an vawrh darh chu ZPM Thalai chuan an ngaih thutak hle thu sawiin ruihhlo tawltu hnen atanga ZPM-in pawisa an dawng anga inpuhna phei chu ngawih bopui chi-ah an ngaih loh thu an sawi.

Pu Rokhuma chuan dawt thu hmanga Minister-te leh ZPM Party beihna chu intihhmingchhiat tumna ngeia an ngaih vangin FIR hi an thehlut tih a sawi.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihlthlak leh chhiar theih a dah thin a ni.

Zanin dar 6 leh a chanve-ah Chanchinthar hi puan leh a ni ang.



DDK DELHI TEAM VISITS DD MIZORAM

Doordarshan Directorate team te chuan nimin khan ADG, P&D, Ved Prakash hoin Doordarshan Durtlang rawn tlawhin, Doordarshan Kendra te hmanrua dinhmun an enfiah.

Doordarshan Delhi atanga lo kal te hi Ved Prakash, ADG, P&D, Abhishek Agrawal, DDG (E), DG:DD, Himanshu Goel, DE, Studio Design leh Vivek Katiyar, ADE, Satellite Design te an ni a, ADG leh a thawhpuite hi Doordarshan Aizawl Head of Office, OP Tripathi, Head of Programme, Pu C. Vanlalsiama, leh Akashvani Aizawl Station Director, Pu DR Lalropuia ten an lo dawngsawng a, kum 3 chhunga Doordarshan Kendra hrang hrang tihchangtlun kawnga hmalakna te rawn enfiahin, Doordarshan Aizawl hotute nen an inkawm a, Mizorama Doordarshan mamawh hrang hrang leh hmalakna awm mekte leh, hmanrua tihchangtlun zel a tul dante an sawiho bawk a ni.



## NATIONS PAY HOMAGE TO Dr BR AMBEDKAR

India Danpui duanna a sulsutu ber, Dr. BR Ambedkar-a pianchampha 134-na pualin vawiin khan ram pumah amah zahna lantirna hun hmun hrang hrangah hman a ni.

New Delhi ah chuan President Droupadi Murmu, Vice President Jagdeep Dhankhar, Prime Minister Narendra Modi, Lok Sabha Speaker Om Birla, Rajya Sabha Deputy Chairman Harivansh, Rajya Sabha House Leader J P Nadda, Rajya Sabha Leader of Opposition Mallikarjun Kharge, Lok Sabha Leader of Opposition Rahul Gandhi, Union Ministers te leh Members of Parliament bakah sawrkar mi pawimawh dang ten Parliament House-a a lim an siam ah zahna pangpar an dah a,

Heng bakah hian Samvidhan Sadan Central Hall-a Dr BR Ambedkar-a lemziak an dahna ah Lok Sabha Speaker Om Birla, Delhi Chief Minister Rekha Gupta, Union Minister te leh Members of Parliament bakah party hrang hrang hruaituten zahna chibai an buk bawk.

Dr. Ambedkar-a hi kum 1891 April ni 14-ah Madhya Pradesh-a Mhow khuaah a piang a, a hun pumin mi rethei leh hnuaihnnung zawkte dinhmun chawikan nan a thawk thin a, kum 1990 khan India rama civil mi chawimawina sang ber Bharat Ratna hlan a ni a, dinhmun hniam atanga ramchhung rorelnaa Law and Justice Minister hmasa ber a ni bawk . A piancham pual hian ramchhung hmun hrang hrangah amah zahna lantirna hun buatsaih thin a ni.

